



想愛飛个番鴨公

該隻細番鴨公又臥頭看掛啊在樹椏項个禾鴨仔，佢恁想自家有一日乜做得同鳥仔共樣，在天頂項飛上飛下。

佢同翼胛開開來，撥來撥去，緊撥緊大力，毋過厥腳本本揸等地，根本就無飛起來。脣口該兜鴨嫲看著就噓佢講：「你敢有看過大籬牯飛上天？」佢一下仔無聽識，另外一隻又跔等噓佢講：「佢等鴨仔隻隻都掄肥！無像鳥仔个身材，瘦夾夾仔，斯愛仰仔飛起來？尤其你等鴨公，隻隻又比佢等鴨嫲過大隻，莫恁多啊！」

「係啊！佢等鴨仔行路一戛一翹也毋會壞看到哪去？無需要跔人學飛。」又有鴨嫲在噓佢。佢幹頭看著其他个大鴨公行路个樣仔，正經就戛戛翹翹、搖搖擺擺，講壞看到哪去乜毋會。但係佢看著鳥仔做得飛上飛下，佢就想愛同佢等共樣，做得自由自在，愛去哪就去哪。

佢記得鴨嫲噓佢講个，做毋得食忒肥，故所每擺主人來餵料仔該下，佢淨食半飽就行開。尾下，同佢共竇个鴨仔大細爭差一半有，厥身仔比起鴨嫲都還過細隻。有一隻鴨嫲看著佢恁仔，就過勸話佢：「你敢係覺得餓啊瘦身就做得飛？其實佢等一出世，一片个翼胛分主人剪核一裁，早就注定做毋得飛也！」鴨嫲講核就開開厥該少核一裁个翼分細番鴨公看。

細番鴨公看著鴨嫲个翼胛，正知得自家个翼胛做麼个兩片無共樣。「跛翼」愛仰仔來飛？佢頭磬磬仔行去籬笆脣，將厥另外一片个翼胛在籬笆項磨上磨下，磨到出血，尾節个毛也敲淨淨。雖然肉痛啊佢盡想噉，毋過為著愛飛，佢甘願忍下去。掠尾，厥該節翼分佢傷啊生毋出毛。大家人看著恁仔，每一個人人都拂頭。

有一日，佢看著農場肚个鵝仔在走相逐，隻隻都開開翼，緊走緊撥，蓋像會飛起來个樣仔。佢乜跔等用這種方式，在農場肚學鵝仔，緊走緊撥、緊撥緊走。佢一下用力撥厥翼，腳用力挺啊去，飛起來也！講飛也毋係像鳥仔做得飛高、飛遠。佢就飛啊差毋多籬笆一半恁高，佢感受著厥腳離開地泥个感覺，心肚就歡喜。佢飛無遠，就幾步腳定定，毋過佢毋使再一戛一翹行路，厥心肚就暢啊無結煞。佢會飛也，最起碼厥心肚係恁仔恁个。

佢續等仔磨厥翼，佢想愛保持兩片翼胛平衡，佢不時就在農場裡背練習半跳半飛。定定仔，佢又學著飛啊籬笆項，用厥爪仔抓等籬笆个樹椏。等佢抓過後，佢做得掛啊在籬笆項。佢看等禾鴨仔在樹椏項跳上跳下，又學著共樣个本事，這下佢做得在籬笆跳上跌落也，連籬笆頂佢都上得去。

佢對籬笆頂跳啊下去，撥等翼，佢做得飛過遠也！有一擺，佢跳出農場个方向，撥一下翼「飛」走也！過也幾下日，佢又企啊在籬笆頂，農場裡背其他个鴨仔頭臥臥仔問佢：「你飛去哪啊？做得講分佢等聽無？」

細番鴨公風神个講：「外背个世界，故事多咧！」講核，佢腳一挺、用力撥厥翼，佢又「飛」起來也！

作者：陳志寧

☆詞彙學習☆

【掄肥】lem' pi'：肥嘟嘟的樣子。

【一裁】id' coi：一小節。

【一戛一翹】id' fung' id' kieu：形容走路搖搖擺擺的樣子。

【跛翼】bai' id：翅膀有殘缺、障礙。

【料仔】liau e'：泛指給鴨子吃的食物。

【挺腳】ten' giog'：腳用力蹬。

【抓等】za' den'：抓著。

【掠尾】liag' mi'：最後。